



Uumbaji Unatoa Ushahidi kwa

Ajili ya Imani

Mambo ya siri ni ya Bwana, Mungu wetu; lakini mambo yaliyofunuliwa ni yetu sisi na watoto wetu milele, ili tuyafanye maneno yote ya sheria hii.— **Kumbukumbu la Torati 29:29.**

Neno la Mungu linaletwa kama taa ya miguu yetu, na mwanga wa njia yetu. Wale wanaoweka Neno Lake nyuma yao, na kutafuta kwa falsafa kipofu kufuatilia siri za ajabu za Yehova watajikwaa gizani. Mwongozo umekabidhiwa kwa wanadamu ambao kwa huo wanaweza kumfuata Yehova na kazi Yake kadiri itakavyokuwa kwa ajili ya manufaa yao. Katika kutupatia historia ya Gharika, uvuvio umeelezea mafumbo ya ajabu, kiasi kwamba kamwe jiolojia bila uvuvio, isingeweza.

Imekuwa kazi maalum ya Shetani kuongoza watu walioanguka dhambini kuasi dhidi ya serikali ya Mungu, naye amefanikiwa sana katika jitihada zake. Amejaribu kutia giza sheria ya Mungu, ambayo kwa yenyewe huwa iko wazi sana. Amedhihirisha chuki ya pekee dhidi ya kanuni ya nne ya Amri Kumi, kwa sababu hiyo inamuelezea Mungu aliye hai, Muumba wa mbingu na nchi. Kanuni zilizo wazi kabisa za Yehova zinageuzwa, ili kupokea hekaya za kikafiri.

Mwanadamu ataachwa bila udhuru. Mungu ametoa uthibitisho wa kutosha ambao katika huo umewekwa msingi wa imani kama mtu atataka kuamini. Katika siku za mwisho, dunia itakaribia kukosa kabisa imani ya kweli. Kwa kisingizio kidogo tu, Neno la Mungu litachukuliwa kuwa halitegemewi, wakati ambapo mawazo ya kibinadamu yatapokelewa, licha ya kuwa yanapingana na ukweli wa wazi wa Maandiko. Watu watajaribu kuelezea kazi ya uumbaji kwa sababu za kiasili, ambayo Mungu hajawahi kuifunua. Lakini sayansi ya kibinadamu haiwezi kuchunguza siri za Mungu wa mbinguni, na kuelezea kazi za ajabu za uumbaji, ambazo zilikuwa muujiza wa nguvu za Ukuu Wake, kama vile isivyoweza kuonesha jinsi Mungu alivyokuja kuwepo.

“Mambo ya siri ni ya Bwana, Mungu wetu; lakini mambo yaliyofunuliwa ni yetu sisi na watoto wetu milele”... Njia za Mungu siyo njia zetu, wala mawazo Yake sio kama mawazo yetu. Kamwe sayansi ya kibinadamu haitaweza kutoa taarifa ya kina ya matendo Yake ya ajabu. Mungu alikusudia hivyo kwamba wanaume, wanyama na miti, vilivyokuwa vikubwa mara nyingi sana zaidi ya vile vilivyopo duniani leo, pamoja na vitu vingine, vizikwe ardhini wakati wa Gharika, na hapo pawe na ushuhuda uliohifadhiwa kwa ajili ya mwanadamu kwamba wakazi wa ulimwengu wa kale uliangamizwa na gharika. Mungu alikusudia kwamba ugunduzi wa vitu hivi katika nchi uimarishwe imani ya watu katika historia iliyovuviwa. Lakini watu, wakiwa na hoja zao zisizofaa, wanatumia vibaya vitu hivi ambavyo Mungu alikusudia viwaongoze kumtukua Yeye (Spiritual Gifts 3:94-96).